



UNIVERSITÄTS-  
BIBLIOTHEK  
PADERBORN

## **Locutio Dei Ad Cor Religiosi**

**Pawłowski, Daniel**

**Dilingæ, 1686**

Manè, Doctrina Practica. De perfecta intentione actionibus nostris  
præfigenda

---

[urn:nbn:de:hbz:466:1-60052](https://nbn-resolving.org/urn:nbn:de:hbz:466:1-60052)

# DOCTRINA PRACTICA

Tempore Matutino Diei Primæ  
relegenda.

*De Perfecta intentione, actionibus  
nostris præfigendâ.*

1. **D**Ocent graves Theologi, inter quos  
Suarez & Vasquez tom. 3. in 3. part.  
disp. 13. sect. 31. & alibi, ad hoc ut opera  
nostra sint meritoria, requiri intentionem  
saltem virtuale, seu ut quis operetur ex vi  
intentionis præteritæ, quæ moraliter influat,  
& causet actionem de præsentî: sic omnes  
actiones Religiosi per totam diem erunt me-  
ritoriæ, si manè Intentionem actualem pro  
tota die fecerit; hæc enim Intentio impri-  
met animæ affectum, ex quo omnes totius  
diei actiones sequentur & fluent, dummodo  
Intentio Matutina per aliam contrariam non  
retractetur aut interrumpatur.

2. Plus dicunt Alij, dum asserunt, Inten-  
tionem istam ad omnes nostras actiones esse  
de Præcepto Charitatis: atque ita docet S.  
Thom. 2. 2. q. 69. a. 1. dum illa verba Apo-  
stoli 1. Cor. 10. *sive manducatis, sive bibitis,  
sive aliud quid facitis, omnia in gloriam Dei fa-  
cite*, censet esse præceptiva; explicat autem  
mentem suam, dum in QQ. disput. de Cha-

A 7

rit

rit. ait: *Virtualiter referre omnia in Deum, cadit sub præcepto Charitatis*: quia, ut addit 1. 2. q. 100. a. 10. præceptum est, diligendi Deum ex toto corde, ad quod pertinet, virtualiter referre omnia in Deum, sic saltem ad minimum, ut si quæreretur ex homine, *facisne hoc opus propter Deum? visne hoc opere laudare Deum?* dispositus sit ad respondendum promptè, *facio, volo.*

3. Certum est, Religiosum, sicut ex vi status sui tenetur proficere in via Dei, ita teneri ad istam Intentionem; Intentio enim ista est motus in Deum, atque ideo est initium viæ Dei. Hinc accurati servi Dei singulis actionibus, præsertim notabilioribus, actualem intentionem præfigunt, aliquot saltem verbis, e. g. *propter te, Deus!* atque ad hanc accuratorem urget nos Regula 17. Summarij, in qua jubemur omnes, rectam Intentionem habere circa res omnes particulares. Excelluit in hoc P. Nicolaus Lancicius, famâ sanctitatis clarus, qui dono Dei eò devenerat, ut singulos passus, dum incederet, & singulas literas, dum scriberet, actuali intentione offerret Deo, dicens in mente, *propter Te!* idèmq; faciendum alijs suadebat.

4. Sicut autem Perfectio Christiana, juxta Apost. ad Ephes. 3. consistit in quadam comprehensione Latitudinis, Longitudinis, sub-

Sublimitatis & Profundi, ita perfecta Intentio suam habet Latitudinem, Longitudinem, Profunditatem & Sublimitatem, ut videbimus.

## §. I.

*Latitudo Intentionis.*

1. Complectitur hæc totam actionem, & omnes ejus etiam minimas circumstantias, extensionem, intensionem &c. si enim in observanda Lege Dei Jota unum aut unus apex non debet præteriri, etiam in laudando Deo nec minimus apex debet præteriri, quin offeratur Deo.

2. Complectitur totum hominem, cum omnibus potentijs & viribus, tam animi quam corporis, ita ut quis intendat laudem Dei se toto: tanta latitudine ferebatur in Deum, qui dicebat Psal. 102. *benedic anima mea Domino, & omnia, quæ intra me sunt &c.* Et: *omnia ossa mea dicent, Domine, quis similis Tibi?* Psal. 34.

3. Complectitur quintuplicem fructum, cuilibet bono operi hominis justii annexum: nempe 1. *fructum adorationis & laudis*, juxta Apost. sup. cit. qui vult, omnia à nobis fieri in gloriam Dei. 2. *fructum gratiarum actionis*; est enim realis gratiarum actio, facere opera grata Deo. 3. *fructum meritorium augmenti Gratia & Gloria*; quem fructum re-

spondere operibus hominis iusti, definit Concil. Trid. Sess. 6. can. 24. & 26. 4. *Fru-ctum impetratorium* quorumcunque bonorum; est enim inter hominem iustum & Deum iste quasi contractus, *facio, ut des*, ex testimonio ipsius Dei, Gen. 4. *nonne si bene egeris, recipies?* 5. *Fructum satisfactorium*, quem respondere cuilibet operi hominis iusti, colligitur ex verbis, post absolutionem Sacramentalem proferri solitis: *quidquid boni feceris &c. sit tibi in remissionem peccatorum*: nempe quoad reatum poenae; reatus enim culpae remittitur per Sacramentum Poenitentiae.

4. Complectitur motiva omnium virtutum, ex quibus simul sumptis quodlibet opus fieri potest, ita ut opus illud sit imperatum ab omnibus Virtutibus, perinde atque Contritio, procedens ex motivo Charitatis, est Actus imperatus Charitatis.

5. Complectitur Intensionem & Extensionem ad omnem possibilem fervorem, devotionem, amorem & desiderium majoris gloriae Dei: fundatur haec Latitudo in verbis Ecclesiastici, c. 43. *Benedicentes Dominum, exaltate illum, quantum potestis; major est enim omni laude.*

## §. II.

*Longitudo Intentionis.*

**E**Xtenditur haec I. ad omnia & singula  
mo:

momenta totius vitæ, juxta illud: *Pfallam Deo meo, quamdiu fuero*, Psal. 145. II. ad totam æternitatem & ultrâ, si quid ultrâ possibile foret, innuente id Prophetâ, *nos autem ambulabimus in nomine Domini Dei nostri in æternum, & ultrâ*, Micheæ 4. III. ad volendum faciendûmque aliquid propter Deum semel pro semper, imitando Deum, cujus verbum manet in æternum: *semel*, inquit, *juravi* &c. Psal. 88. IV. ad retractandum omne tempus præteritum, non in obsequio Dei transactum: sic retractabat Job diem, in qua natus est, Job. c. 3.

## §. III.

*Profunditas Intentionis.*

**E**Xtenditur I. ad humiliationem sui juxta mensuram propriæ vilitatis, & nihili peccatorum: in talem profunditatem demiserat se Psalmista, dum *de profundis* clamabat ad Dominum, Psal. 129. II. ad retractationem & compensationem omnis mali, tam à se, quàm ab omni creatura commissi: actus iste imperatur à Virtute Pœnitentiæ juxta doctrinam Theologorum. III. ad conjunctionem cum omni etiam irrationali creaturâ, omnium nomine laudando Deum, uti videre est in cantico Trium Puerorum, & alibi, ubi etiam *Dracones* invitantur ad laudandum Deum, Psal. 148.

A 7

IV.

IV. ad conjunctionem suam cum omnibus peccatoribus, imò etiam dæmonibus, atque omnibus damnatis, volendo supplere laudem, quæ Deo ab ijs denegatur: laudabiliter fit hæc adimpletio defectuum laudis Dei, non minùs quàm laudabiliter S. Paulus adimplebat ea, quæ deerant Passionum Christi, in carne sua, pro Corpore Christi, quod est Ecclesia, Coloss. 1.

§. IV.

*Sublimitas Intentionis.*

**E**levari illa debet I. ad conjunctionem suam cum omnibus sanctis, quoad omnes eorum actus: sic in Canone Missæ dicimus: *accepta habere digneris, sicuti accepta habere dignatus es munera pueri tui justi Abel &c.* II. ad unionem cum pretiosissima Deiparente, volendo agere instar illius, seu Marianè; Maria enim est Mater nostra, & nos filij eius non emancipati, qui in jure unum cum Matre censentur. III. ad intimam conjunctionem cum Christo, offerendo omnia per illum, & in illo, volendoque agere Christiformiter: hoc est, quod suadet Apostolus, *omnia agere in nomine Domini Iesu*, ad Coloss. 3. IV. ad aliquam velut transformationem in ipsum Deum, offerendo actiones nostras plenissimè voluntati & gustui Dei, quia nimirum eas vult, & prout vult, tanquam ju-  
ge

ge ac perpetuum sacrificium, debitum Deo, velut omnium authori, ac Domino vitæ & necis, idque unicè propter bonum ejus, & quia est summum Bonum: fundatur hæc Elevatio Intentionis in illo Psal. 33. *Exaltemus nomen ejus in idipsum: & si ille juravit per semetipsum, Gen. 22. nos quoque possumus laudare illum per seipsum.*

## DIEI PRIMÆ MEDITATIO II.

De Fine, ad quem creatus est  
homo.

*De hoc S. P. N. in Medit. quam appellat Fundamentum, ita ait: Creatus est homo ad hunc finem, ut Dominum Deum suum laudet, ac revereatur, etque serviens tandem salvus fiat.*

ORATIO PRÆPARATORIA, &  
PRÆLUDIUM I. ut in Meditatione præced.

PRÆLUD. II. Pete à Deo gratiam cognoscendi finem Creationis tuæ, tendendi ad illum, & consequendi illum.

PUNCTUM I. Audi Deum dicentem per Prophetam, Ps. 99. *ipse fecit nos & non ipsi nos. Et per alium: Nunquid non Deus unus creavit nos? Malach. 2. Creavit te Deus origina-*